

方泰志

重印方秦志序

方秦爲嘉定西南一小市集向無志書鄉先達王竹所先生始創爲之成書三卷印行於清嘉慶十二年歷時既久復經兵燹舊刻本散佚殆盡搜訪數年僅獲全書雖寶藏之未敢必其久而勿失也夫鎮之有志固無關於國家之掌故然市廛寺觀水道橋梁之建置沿革故家大族之興廢盛衰民風物產之隆替豐耗端人碩士之嘉言懿行胥於是乎在昔人以數典忘祖爲大戒今之教育家言地理者必首先鄉土若并此僅存之遺編而遂亡之後之人欲考數百年前之陳迹將孰從而求之則生斯土者安可不籌所以垂諸久遠之方邪今年秋商之同里唐君靜涵暨庠侯賦聲兩姪皆以爲然爰命兒子錫時以聽鼓餘閒任校讎之役排印數百本以廣流傳庶斯編之常存於天壤而後之有志纂輯舊聞以繼斯編者亦得所藉手也工既竣爲誌其緣起如此中華民國四年冬十月後學陳乃鈞謹識

方秦志序

方秦藪爾荒墟自百餘年來嚴陳振起始有鎮之稱前此惟南王北邱而已吾宗高涇一支卜居於永樂間以饒裕稱者三百餘載大抵豪右而兼風雅而邱則時時講明於庸德庸行之常以故兩家子孫食報邱勝於王迄今衰敝邱尙皆有恆產恆心王則不能矣從弟竹所超然拔萃人也文采風流之日一時甲於海內經眼羣書至於二十萬卷有奇平生著述半已刊布茲歸田七載後作方秦志三卷記載體裁而範之以史家圭臬不爲褒貶之詞陰寓監戒之意蕭灑蘊藉有歐陽氏之風他日高涇後裔仍理詩書舊業諷誦及之倘或爲之感慕而興起焉則是編之有裨於王氏何如也雖然豈獨有裨於王氏哉豈獨有裨於王氏哉嘉慶十二年歲次丁卯上元後三日兄元勳書於彩虹橋之紅梨翠竹山房時年八十

方泰志目錄

里人王初桐于陽纂輯

原名元烈字耿仲
時年七十有八

同里陳經元範倫採訪

陳璋達夫校錄

陳鵬象五參訂

卷一

發凡

源委

疆界

街市

八到

寺院

廟宇

水道

橋梁

村落

第宅

園亭

宗祠

坊表

岡墩

厲壇

古蹟

土產

風俗

卷二

儒林

文苑

孝友

忠烈

賢達

俊傑

德義

善良

進士

舉人

歲貢

例貢

職員

仕宦

吏隱

封贈

仙釋

列女

流寓

卷三

藝文

墳墓

石刻

雜綴

方秦志卷一

發凡

自明洪武以來縣志不下幾千部除康海武功縣志崔銑安陽縣志而外蕪陋者多明史藝文志不著於錄我朝欽定四庫全書但收通志而不收縣志蓋有一統志五百卷以爲之綱各省通志以爲之目天下事囊括無遺矣縣志何爲至于鎮則又縣之分區不更渺乎其平而亦有不可忽者志者所以備掌故也一邑有一邑之掌故一里有一里之掌故宋常棠澈水志鎮志之權輿也卽槎溪陸廷粲南村隨筆所記多鄉曲之事高宗純皇帝勘問吳魯珍事蹟搜攷及之其書遂盛行於都下以是知識大識小皆有可觀閒中載筆無不可爲查核之資况乎父母之邦生長於斯者莫不有子孫樂道祖宗之意某樹先人之所植某水某邱先子所釣遊倘非筆之於書則一傳再傳之後指點都迷欲尙論其人其世而不可得殊非恭敬桑梓之道矣學者惟不忘乎鄉而後能及于天下此鎮志之所以不可不作也嘗攷我邑志乘都氏練川圖記止有市鎮龔志又有村楊韓趙志又有行程志謂惟南翔安亭黃渡羅店大場江灣高橋七鎮歷年最久雍正三年分縣之後羅店高橋江灣大場皆屬之寶山嘉定之鎮之歷年久者惟南翔黃渡安亭其餘則廢興沿革不一方秦鎮鎮之小焉者也先有方秦寺後有方秦鎮鎮以寺名也宋元以前但有寺旁小村落稱爲方秦墟至明正德

間陳員外榮富甲里中營第宅構園亭建牌坊極一時之盛後卽蕭索第宅園亭盡爲平地子姓亦淩替殆盡僅沿一綫所留遺至今者惟牌坊而已明季時居民鮮少寥落幾家大抵皆經紀小販賣當時雖有南王北邱之號而王處高涇邱處菱門涇皆離鎮三里鎮中絕無詩書門第亦無殷實鉅戶國初尙然至康熙間陳君浩如修仁行義業漸起旋卽有嚴君素章自羅店來僑居於此兩家氣象興隆枝葉蕃衍延師於塾課子讀書游於泮者有人舉於鄉者有人秉鐸於黌序者有人而鎮中始有詩書門第矣自兩家以猗頓之術起家爲一鎮領袖一鎮化之習於勤儉各鋪戶皆日長炎炎由是房屋陸續增添街衢漸次改觀布庄開張典商望風而至百貨駢集遂成鬧市而鎮中始有殷實鉅戶矣蓋地運將轉天卽篤生一二有爲有守之人以振起之日新月盛似有爲之默運而潛移者方泰鎮之稱實始於此顧百餘年之間老成凋謝文獻無徵所有賢良方正皆不能永其天年而就衰之氣運岌岌乎又將有今昔之殊矣昔顧亭林在永平或屬爲府志亭林謝之曰郭造鄉在戚將軍幕府搜羅天下書志略備凡十年而成燕史今之志郡縣者多取成於數月之間安問其可傳不可傳乎以方泰叢爾之區視永平不啻泰山之於培塿且僻在邑之西南隅記載之所不及題詠之所罕到卽假以十年之功搜羅天下書志亦無所用之今欲網羅舊聞爲信今傳後之計而擇焉不能精語焉不能詳聊舉耳目聞見之所及者著於篇亭林所謂取成於數月之

間者也惟鎮與縣不同縣之城池公廨學校社稷倉廩鎮皆無有故不用縣志舊例竊取楊街之孟元老周公謹諸家之意成之與縣志大同而小異云

源委

方泰在崑山縣東境練祁市其地唐曰新豐鄉宋曰安亭鄉至寧宗嘉定十年分崑山東境五鄉爲嘉定縣卽以紀年名之而方泰遂屬嘉定之服禮鄉服禮鄉者五鄉之一卽安亭鄉改名也嘉定本屬蘇州雍正三年陞太倉爲直隸州始屬太倉州

疆界

經界旣正一定不移茲特採風紀事而已然亦不可無限界方泰在服禮鄉十六都十七都其南則二十一都東則守信鄉二都各都皆有犬牙相錯之勢據都定界必致遠近參差徒增輻輳今酌東以漳浦爲界南以小吳塘爲界西以塔廟爲界北以沙岡橋爲界東西南北各距五里合之則方四十里

街市

方泰鎮南北一里東西如之中街通衢大道南通黃渡北通外岡東街在晝錦坊背後轉東謂之朱雀街西街在清風橋北挽轉西謂之玄武街又有廟街在中街東荒場街在中街西八到

東至石岡門一十六里東南至馬陸一十八里南至南翔二十四里西南至黃渡一十二里西至安亭一十二里西北至望仙橋一十八里北至外岡一十二里東北至縣治一十八里北至太倉州城三十六里西北至蘇州府城一百四十里北至京師陸程三千六百里水程四千四百里

寺院

列寺於前變例也廟則連而及之

方秦寺建始自梁武帝天監二年癸未至唐宣宗大中三年己巳寺主廸法師偕德主顏公遠奏聞賜以今額重興寺宇自初建至此三百四十一年又五十五年爲昭宗天復三年癸亥吳越錢武肅王宣賜圖記恩渥滋茂又三十五年爲石晉天福二年建造完具七年寺僧從誨承繼寺事其徒佳持甲乙資次者自此始焉又一百二十九年爲趙宋仁宗嘉祐七年壬寅四月三日寺主先公命戒德沙門圓鑒爲之結界又六十四年爲高宗建炎元年大金十四年爲紹興三十一年辛巳尙有百餘衆是年二月二十一日僧房回祿其山門佛殿廊廡鐘樓天閣法望廚庫齋寮悉皆瓦礫歷代碑碣亦皆焚毀又六年孝宗乾道三年丁亥住持清爽幹緣沙門如琇擇仁若珍等同建釋迦殿彌陀殿僧房觀音普賢殿泗州殿水陸堂

十王堂山門兩廊浴堂悉皆備焉又一百五十五年爲元延祐七年住持指南偕比丘妙通建造明樓一所其釋迦彌陀兩廊前後映帶碧護相輝又六年爲太定三年丙寅春住持日新因殿堂零替作興修造寺東王德明一力重建法輪殿藏經閣又七年爲至順四年癸酉王德明之弟德榮重建觀音殿大士聖容諸天像設一力成就凡蒙林所宜有舊則新之缺則完之僧房一十八所寺無空地又十八年爲至正十二年壬辰春有徐盛甫增益香花亭一所自初建至此已八百六十四年明洪武二十二年己巳沙門良士募緣修葺山門鐘樓觀音殿明年庚午畢工爾時牛筋鴨腳之木平仲君遷之果蔚于園中晨鐘暮鼓粥茶板之聲徹于雲表金花耀日寶蓋浮空栴檀氤氳幡幢飄拂遊人過之尙以爲不減祗樹林也二十四年辛未秋國家清理佛教其右額寺院悉成蒙林非右額者盡皆革去嘉定舊有寺院庵居一百二十餘處至此并爲二十四方泰寺在數中永樂二十一年癸卯却火俱各燒毀正德三年造殿至嘉靖十八年頽毀僅存一房一僧又奉部筭賣充邊餉寺旁餘地始屬諸民二十八年己酉邱集欲葬其先人卜地不得鄉人皆以寺址稅累糧里包賠堪輿家素云可葬遂與邱氏爲墓域自始建寺至此已一千四十八年矣四十二年僧志方募緣徙建佛殿三間於漂漚南撤故材爲之閣三載殿木且腐當無片瓦之覆四十五年募緣重建一殿國朝康熙三年徽商汪皆泰建山門四十年住持僧純庵建觀音殿于寺後乾隆三十九

年僧方隅募緣重修嘉慶十年僧顯微又建十笏軒于觀音殿後自嘉靖二十八年至此又二百五十七年中間幾經整理惟規模本不閎敞而又右礙民房左逼城隍行宮欲復蕭梁之舊觀終不可得矣

掛一備忘引方泰寺記云在崑山東七十里按方泰寺記其書已久佚不傳

王初桐題十笏軒詩支公方丈地別構小精廬十里寒塘外千年古殿餘幽花臨檻靜空翠落庭虛惟有閒檀越時來讀梵書

廟宇

城隍廟建於康熙六十年至乾隆二年里人陳松若甘孝全募緣續建頭門戲臺兩廊黝堊輪奐一里觀瞻廟在方泰寺之左與寺通連

唐李陽冰縉雲城隍記以爲祀典無之惟吳越有耳然成都城隍祠太和中所建張說有祭城隍文杜牧有祭黃州城隍文李商隱有祭桂州兗州靈州荔浦城隍文則不獨吳越然矣蕪湖城隍廟建於吳赤烏二年高齊慕容燕梁武陵王祝城隍神皆書於史則又不獨唐以後然矣自宋以來其祀遍天下或賜廟額或頒封號或遷就傳會各指一人爲神之姓名如寧國太平等郡邑皆以爲紀信隆興袁江建昌南康皆以爲灌嬰嘉定城隍神爲顯佑伯廟在城內而各鎮皆有行宮其神之無所往而不在者如水之在地中也

城隍名

見于易廟祀則始於伊耆氏伊耆堯也作蜡八水庸居七水則隍也庸則城也此正祭城隍之始

文昌閣舊爲趙公書院在城隍廟東

斗姥閣在文昌閣後

斗姥名摩利支天菩薩熊文燦以爲卽玄女

雷祖廟在斗姥閣後

關帝廟在城隍廟東北以上三廟皆局於鹽鐵塘渢渢之隅一山門作幾山門未嘗有專宮別殿也

龍鐵芝史略康熙戊午昌平人於解州掘井得帝父奉祀考主碑守主王朱旦樹碣表其事略云帝祖諱審字問之號石盤居解梁常平村以春秋訓子帝父諱毅字道遠庚子六月二十四日生帝于故里帝長讀父書博通淹貫娶胡氏光緒元年戊午五月生子平觀此則五月十三日乃帝子平誕期以爲帝誕期蓋本桃園記

火神廟在北巷門

小土地廟在方泰寺前房十八家土地廟在西巷門外八字橋土地廟在八字橋村以上三廟其神皆葛江宋王司鄉民取報賽之便各建一祠奉之而分畫其廟界昔項羽爲吳淞江神屢有風波之警唐時立漢七十二功臣廟以鎮之葛江宋王者曹參也或言元季孝廉宋顯臣生前正直歿後上帝命爲土地司或又言宋顯臣乃潼岡土地司

顧野王廟在守信鄉二都舊名長慶庵本孫氏家庵康熙十年募緣重建改爲觀音堂其土地神卽希馮也希馮讀書臺在秀州墓在蘇州石湖其所以廟食於此者蓋因當時疫癘盛行終有邪祟故立諸忠臣義士之廟以厭之後人皆祀爲土地也住持法雲又建蕊珠堂并置田五十畝詳請布政司勒石在廟

老顧廟在八字橋東小顧廟在鎮東南隅兩廟土地神皆卽顧野王也舊署爲陳黃門侍郎贈祕書監右衛將軍顧公廟

歐司徒廟在陸家浜上淳壽村東北其神爲歐陽修修非司徒而俗號歐司徒猶之毛司徒廟爲毛滂袁司徒廟爲袁紹沈司徒廟爲沈約滂紹約皆非司徒而俗皆號司徒也蓋司徒之名起於少昊唐虞三代皆因之其職則巡行縣鄙命農勉作凡邦域疇圻土地人民廣輪圖數山澤邱陵墳衍原隰悉統所轄韓詩外傳曰土地不腴五穀不植責在司徒後世以司徒爲土穀神之美稱而又假古賢人之名以當之曰某司徒耳

觀音廟在吳塘橋東福田庵在吳塘東化善庵塔廟在吳塘西漳浦觀音堂在南漳浦橋西

中庵在淺岡墩東北已廢

水道

唐以前嘉定概爲平陸趙宋時溶導之功始興縱而爲漚衡而爲塘大者爲港次者爲浦轉而爲涇分而爲浜回而爲灣合而爲匯派而爲溝爲漕是皆水之由名然涇沒者亦多矣

鹽鐵塘舊傳吳王濞鑿以運鹽鐵南通吳淞江北通揚子江或云吳越錢氏時今之鹽鐵塘在吳塘東有南鹽鐵北鹽鐵南鹽鐵南接陸皎浦受吳淞江之水北流過方泰貫練祁練祁塘長七十二里有東練祁西練祁此則西練祁也宋王斗祥練川歌吳淞江上流來水鴨綠粼粼漾清泚是其明證元至正元年工部尙書禿魯溶鹽鐵塘明天順三年知縣龍晉溶之八年又溶之成化八年知縣白思明溶之弘治元年知縣陳遵毅溶之嘉靖二年知縣蔡復元溶之四年提督水利蔡乾溶之二十一年知縣張重又溶之萬曆七年知縣徐上達溶之崇禎十七年知縣錢默溶之國朝順治十年知縣查逢盛溶之康熙三十五年知縣許鍾英溶之雍正二年知縣趙向奎溶南鹽鐵從外岡至黃渡出吳淞江口而止

陶家灣在高涇東南暮疑灣在姚家橋北茂林灣在沙岡橋皆鹽鐵塘之灣也

吳塘在鹽鐵塘西南接黃渡浦受吳淞江之水經方泰之西直北貫西練祁又西北會顧浦通太倉戚虞涇達劉家河明弘治十年知縣孫璽溶吳塘嘉靖二十四年巡撫呂光洵督溶之隆慶元年巡鹺御史蔚元康溶之萬曆七年知縣徐上達溶之崇禎十七年知縣錢默溶之侯峒曾有錢侯治河刻石記國朝順治十年知縣查逢盛溶之康熙三十六年知縣許鍾

英溶之

宋游君傳吳塘晚泊詩西風吹短鬢孤坐欲銷魂野櫂他鄉客酒旗何處村稻隨秋雨熟水帶晚潮渾寂寞吳塘路塵沙望眼昏

鹽鐵吳塘二水皆幹河也餘皆二水之支河

小吳塘亦名橫塘西通吳塘東通鹽鐵

高涇南受鹽鐵塘灣之水北西入吳塘

趙巷涇東通鹽鐵西通吳塘

三里港東通鹽鐵西南通吳塘

渫淩東通鹽鐵西通吳塘

菱門涇在鹽鐵塘西東接陳涇西入吳塘相傳由練祁至菱門涇岡門凡九宋初設縣謂九門之地可建都邑規畫城郭而未果者也兩岡夾乎左右而陳涇橫貫中央東吞鹽鐵潮沙而斷沙岡大道過此岐流爲三一派西南指入楊閭涇者曰斜涇一派西北指遂折而西入吳塘者曰菱門涇俗謂斷岡引水入內地者曰岡門疑舊嘗產菰菱于此故曰菱門或謂以其交加于陳涇兩山夾水曰疊本作交疊傳寫字訛耳曲折復岐而北流數十步曰黃泥浜雞鳴塘東通漳浦西貫鹽鐵吳塘順治十八年知縣潘師質溶雞鳴塘

譚涇西通鹽鐵東通漳浦

朱涇西受鹽鐵塘之水東流過何家灣入漳浦

申浦西通鹽鐵東通漳浦

陳涇東通漳浦西貫鹽鐵塘會菱門涇入吳塘

已上諸水皆支河之大者其小者則有王家涇南橫涇廟浦綠秀浦吳涇沙浜顧樓小漳浦皆在朱涇南鹽鐵東潦寒涇石浜烟墩浜長浜木涇管涇榔持頭浜全家浜皆在潦樓南吳塘東胡涇新涇前涇皆在吳塘西

李巷浜在李巷或訛爲李郎浜亦曰李家浜又有陶河浜西洋浜孫涇王涇楊涇西亭浜高田浜皆在朱涇北鹽鐵東穆家浜周家浜羅家浜西涇陽呂涇亦名楊柳涇師姑浜牛涇陳岐樓朱家浜陸家浜李家浜夏家涇陶家浜斜涇譚孔涇趙涇周涇皆在潦樓北吳塘東陳家浜徐家涇長安涇孫涇北馬涇顧涇菖蒲樓一望茅葦鄉人驅牛羊牧於其中皆在吳塘西

橋梁

方泰橋在北街跨潦樓俗謂之香花橋或云清風橋者方泰寺前石橋也橋上石刻歲次延祐二年丁亥月癸未吉日王德明建造謹題二十字萬曆七年水涸見之據此則方泰橋亦

名清風橋

朱雀橋在朱雀街跨鹽鐵塘俗謂之東橋南則八字橋北則姚家橋又北則沙岡橋皆跨鹽鐵塘八字橋又名萬緣橋有碑在鎮沙岡橋舊名太原橋有石刻太原王德榮造故取郡望名之

宋游君傳沙岡待潮詩外岡南下是沙岡船儀孤村正晚涼數點弄秋疎雨過槿花籬落帶斜陽

沙岡橋西小石橋名登雲橋徐宣堰名過龍橋

福壽橋方秦墟東北隅李巷浜之岡門橋也刻石云二都李巷村王德明造

南三里橋跨三里港舊名壽豐橋高涇王氏所建乾隆五十二年陳學詩重建

北三里橋跨菱門涇舊名永福橋

同春橋亦作同椿橋在鎮之西偏嚴勤建

西石橋渫漣橋觀稼橋皆跨渫漣

吳塘橋本名萬安橋跨吳塘明永樂元年建國朝嘉慶十二年重建

汪价坐吳塘橋詩平橋小立看斜陽點點楓林葉葉霜一片明霞低綠水雁銜蘆影過橫塘

永寧橋在制號北二圖跨吳塘舊本本橋康熙間易石雍正六年重建

朱涇橋又名永豐橋跨朱涇永安橋綠秀橋皆在金家宅前漳浦橋名萬壽橋又名南漳浦橋

日耀橋在宣家庫東南觀音堂橋在二都場頭村橋與陸家行二橋皆與青浦分界

攬秀橋跨高涇俗稱西橋無欄橋葉家橋皆跨小吳塘人壽橋方隆橋皆跨三里港樵巷橋在潦寒涇出口處已廢亂石在水故有石浜之名

黃家橋又名尙節橋白爵橋在邱家宅皆跨菱門涇交龍橋跨呂婆涇西龍橋在交龍橋西楊木橋本名陽和橋皆跨斜涇樂善橋在西龍橋西陳學禮重建與永興橋皆跨楊呂涇馬橋跨雞鳴塘靈源橋跨黃泥浜嘉靖間邱鉞建

宏治中有白色神爵來集邱宅樸樹上鄉人百計羅之不能得因以白爵名橋

村落

南則履豐里在高涇王氏聚族而居鹽鐵塘環其東南淺岡墩峙其北高涇貫其西方六七里之地兩大宅據于中央軒昂寬敞以素封冠閭里者三百餘年當時人語云王氏履豐里邱家淳壽村今皆凋敝高涇尤甚

王爾達過高涇留宿詩我宗老孫子聚族在高涇流水依村曲修簷繞屋青塲餘新穫稻